

COMISIÓN INFORMATIVA ESPECIAL DE CONTAS E DE FACENDA E ECONOMÍA

ACTA da mencionada comisión informativa, correspondente ao día **11 de decembro de 2019**

Na sala de xuntas do Pazo Provincial da Deputación de Ourense, ás 17.30 horas do día 11 de decembro de 2019, reúnese a comisión informativa Especial de Contas e de Facenda e Economía coa asistencia dos seguintes deputados e deputadas:

Presidente: D. José Miguel Caride Domínguez, **deputado de Democracia Ourensana**

Deputados/as do Grupo Popular:

D. Rosendo Luís Fernández Fernández

D. Plácido Álvarez Dobaño

D. Álvaro José Fernández López

D.^a Consuelo Vispo Seara

D. Miguel Antonio Cid Álvarez

Deputados/as do Grupo Socialista:

D. Margarita Pérez Fernández

D. Aurentino Alonso Araújo

D.^a Susana Rodríguez Estévez

Deputado do BNG: D. Bernardo Varela López

Deputada de Ciudadanos-Partido de la Ciudadanía: D.^a Montserrat Lama Nóvoa

Secretario: D. Francisco Cacharro Gosende

Interventora: D.^a Begoña Álvarez Matos

Seguidamente, iniciouse o tratamento dos asuntos incluídos na orde do día, do xeito que se reflicte a continuación:

1º.- APROBACIÓN DA ACTA DA SESIÓN ANTERIOR, CORRESPONDENTE Á ORDINARIA DO DÍA 20 DE NOVIEMBRE DE 2019.-

Pola Secretaría Xeral deuse traslado do borrador da acta anterior, correspondente á ordinaria do día 20 de novembro de 2019.

Non se producen intervencións e por unanimidade a comisión adopta o seguinte acordo:

Aprobar a acta da sesión ordinaria da Comisión Informativa Especial de Contas e de Facenda e Economía do día 20 de novembro de 2019, conforme co borrador elaborado pola Secretaría Xeral.

2º.- PLAN EXTRATÉXICO DE SUBVENCÍONS DA DEPUTACIÓN PROVINCIAL DE OURENSE E DO INORDE PARA O PERÍODO 2020-2023.-

O Sr. secretario expón o contido da proposta.

D.^a Montserrat Lama Nóvoa, portavoz de Ciudadanos-Partido de la Ciudadanía, anuncia que reservará o seu voto para o Pleno.

D. Bernardo Varela López, portavoz do BNG, cre que este Plan Estratéxico de subvencións é continuista e decepcionante. Lembra que Democracia Ourensana no seu momento apoiou unha proposta conxunta co Grupo Socialista e co BNG, opoñéndose ao uso das subvencións nominativas e que no debate dos orzamentos se quedou en que este tema se estudaría na Xunta de Portavoces para tratar de buscar un consenso. Di que concretamente nos puntos 11 e 12 do apartado do Plan relativo á cooperación municipal, aparece a previsión das subvencións nominativas, ao non reflectirse ningunha cantidade e non terse en conta os criterios demográficos aos que si se fai referencia no apartado D4. Pide que o Plan Estratéxico quede sobre a mesa para tratar de consensuar entre os grupos no sentido de facer un Plan estratéxico que faga realidade as aspiracións desta provincia e lembra que os datos recentemente publicados reflicten unha elevada caída da cifra de traballadores autónomos e o peche de numerosos comercios locais, situación que este plan estratéxico non vai resolver. Insiste no manifestado polo portavoz de Democracia Ourensana en canto á súa disposición a alcanzar un consenso na Xunta de Portavoces.

D. Aurentino Alonso Araújo, do Grupo Socialista, concorda en que os puntos 11 e 12 relativos ás subvencións nominativas son esenciais, e que nese sentido o Plan continúa a pauta da súa concesión sen ningún tipo de control. Pide que se faga unha reflexión sobre o cómputo na práctica dos principios inspiradores que o propio Plan Estratéxico recolle e que

eses puntos 11 e 12 non respectan. Critica que na liña de reto demográfico se poña a *coletilla* de “se hai continuidade nos orzamentos”. Anuncia que se van abster ata Pleno.

D. Plácido Álvarez Dobaño, portavoz do Grupo Popular, cre que ninguén entende aquí o que é un plan estratéxico, que se limita a establecer as grandes liñas de actuación que logo se concretarán nos orzamentos de cada ano, e de feito as previsións para o exercicio 2020 xa foron aprobadas nos orzamentos, e as do ano 2021 e sucesivos pasarán polo Pleno e poderán debaterse amplamente, co que isto non ten máis recorrido.

D.^a Montserrat Lama Nóvoa, portavoz de Ciudadanos-Partido de la Ciudadanía, di que ten moi claro o que é un plan estratéxico e que todos temos dereito a opinar se nos gusta ou non a proposta presentada.

D. Bernardo Varela López, portavoz do BNG, di que el tamén saber o que é un plan estratéxico e o que ocorre é que non está de acordo co que se propón, insistindo en que os datos sobre a avaliación económica da provincia son teimudos; cre que isto se nos está indo das mans a gran velocidade e que hai que intentar poñerlle freo ao declive da provincia e que o plan podería ser unha boa oportunidade ao respecto. Insiste tamén en que hai cousas no plan que non se corresponden co que logo é o seu contido.

D. Aurentino Alonso Araújo, do Grupo Socialista, di que todos estamos en concellos e sabemos o que é un plan estratéxico e mostra a súa desconformidade co dito plan.

D. Plácido Álvarez Dobaño, portavoz do Grupo Popular, di que haberá que ver cantos concellos teñen plan estratéxico e como se aplica. Insiste en que o plan só recolle as grandes liñas estratéxicas e as subvencións nominativas que aparecen aquí xa foron aprobadas polo Pleno en setembro. Con respecto ao portavoz do BNG, dille que estas liñas xenéricas permiten facer todo o que di o Sr. Varela a través do orzamento ou das súas modificacións.

Non se producen máis intervencións, e co voto favorable do Grupo Popular (5) e de Democracia Ourensana (1) e a abstención do Grupo Socialista (3), do BNG (1) e de Ciudadanos-Partido de la Ciudadanía (1), a comisión ditamina favorablemente a adopción, por parte do Pleno, do seguinte acordo:

1º.- Aprobar inicialmente o Plan estratéxico de subvencións da Deputación Provincial de Ourense e do INORDE para o período 2020-2023, co seguinte contido:

I. MEMORIA XUSTIFICATIVA

A vixente **Ordenanza xeral de subvencións da Deputación Provincial de Ourense**, cuxo texto consolidado aprobado definitivamente se publicou no *BOP núm. 260 de data*

12.11.2015 establece no seu *Título III (artigos 12-14)*, baixo a rúbrica “*do plan estratéxico de subvencións*”, a obriga desta Deputación de elaborar e aprobar un plan estratéxico de subvencións, como instrumento de planificación das políticas públicas que teñan por obxecto o fomento de actividades de utilidade pública ou interese social, co contido mínimo e réxime de tramitación, aprobación, seguimento e avaliación alí recollido.

Nesta Ordenanza provincial atópase unha regulación específica da planificación estratéxica das subvencións provinciais, contida no seu citado *Título III*, regulación que intenta adaptar ás peculiaridades da Administración provincial a regulación xeral contida con carácter xeral nos *artigos 8 da Lei 38/2003 xeral de subvencións* e *4 da Lei 9/2007 de subvencións de Galicia*, que carecen dun desenvolvemento regulamentario específico para as entidades locais.

Entre outros aspectos, o Título III da Ordenanza provincial recolle expresamente no seu artigo 12 o carácter preceptivo dos plans estratéxicos como requisito previo para a concesión de subvencións, carácter que viña recollido nos artigos citados da lexislación estatal e autonómica e que foi interpretado pola xurisprudencia do Tribunal Supremo, en sentenzas do 26 de xuño e 4 de decembro de 2012, do seguinte xeito “*...dado o tenor dos apartados 1 e 3 do artigo 8 e da Disposición adicional 13ª da Lei 38/2003, o Plan Estratéxico ao que se refire ten carácter previo ao establecemento de calquera subvención, constituíndo un requisito esencial cuxo cumprimento esixe que sexa formalizado externamente e cun contido que o faga identificable como tal por reflectir alo menos aquilo ao que alude o apartado 1 dese artigo 8...*”.

En consecuencia, a aprobación dun plan estratéxico, co contido e obxectivos sinalados na ordenanza, resulta unha necesidade ineludible para posibilitar a concesión de subvencións nos vindeiros exercicios tanto por parte da Deputación como por parte do Inorde.

Como xa se fixo no mandato anterior (2015-2019), óptase por facer unha planificación a longo prazo, con perspectiva de toda a lexislatura e que abranga os exercicios económicos 2020, 2021, 2022 e 2023, cumpríndose en todo caso os prazos establecidos no *artigo 12.2 da Ordenanza xeral de subvencións* que establece un período de vixencia mínimo dun ano e máximo de catro.

Polo anterior, procedeuse á elaboración do presente Plan estratéxico de subvencións da Deputación Provincial e do Inorde para os exercicios 2020-2023, co contido mínimo previsto no artigo 12.3 da repetida Ordenanza xeral de subvencións desta Deputación, partíndose de que este se concibe, dada a súa natureza e configuración legal, como un instrumento

programático. Non obstante, establécese un nivel mínimo de vinculación co plan establecendo unha específica obriga de motivación das desviacións que eventualmente se produzan respecto das súas previsións. Todo o anterior debera redundar nun maior control do gasto público, polo que o Plan estratéxico debe ser un instrumento que sirva para racionalizar o exercicio da acción de fomento, de tal maneira que se poida seguir mantendo esa acción á vez que, sobre criterios de eficacia, se rendibilicen os recursos que polas circunstancias poden verse limitados.

O Plan estrutúrase en **SETE LIÑAS DE ACCIÓN** iniciais (*1. Cooperación coas entidades locais, 2. Fomento da cultura, 3. Fomento do deporte, 4. Reto demográfico 5. Fomento do benestar social, 6. Fomento do desenvolvemento económico e 7. Fomento do asociacionismo veciñal*), en coherencia coas competencias provinciais e coas previsións dos orzamentos xerais da Deputación Provincial para o exercicio 2020, xa aprobados, e co Plan Ourense 72-73 do grupo de goberno.

II. DETERMINACIÓNS DO PLAN ESTRATÉXICO DE SUBVENCÍONS DA DEPUTACIÓN PROVINCIAL DE OURENSE E DO INORDE PARA O PERIODO 2020-2023.

A) Ámbito de aplicación e alcance das determinacións do Plan Estratéxico de Subvencións 2020-2023.

1. As determinacións contidas no presente plan estratéxico serán de aplicación á totalidade dos procedementos de concesión e xustificación de subvencións xestionadas e financiadas pola Deputación Provincial de Ourense e o Inorde ao longo dos exercicios incluídos no seu ámbito de aplicación.

2. En coherencia co carácter programático do plan, cuxo contido non crea dereitos nin obrigacións e queda condicionado á posta en práctica das diferentes liñas de subvención, atendendo ás disponibilidades orzamentarias do exercicio, as súas determinacións teñen o carácter de orientacións estratéxicas que deben seguirse na xestión dos procedementos correspondentes polos órganos e unidades administrativas competentes da Deputación Provincial e do Inorde. Estas orientacións estratéxicas vincularán con carácter xeral aos órganos da Deputación, nos seguintes termos:

a) Non poderán concederse subvencións para finalidades non comprendidas nas liñas de subvención previstas no presente Plan, agás nos supostos de subvencións que se concedan

para a atención de situacións sobrevidas de catástrofe ou calamidade pública, ou por outras causas de interese público, e en todo caso de xeito motivado.

b) Porén do anterior, nos supostos en que os órganos xestores do plan consideren necesario apartarse das orientacións estratéxicas que este contén, deberán motivalo suficientemente. As desviacións respecto ás previsións do plan serán recollidas no informe de avaliación para coñecemento do Pleno.

3. Establécese a posibilidade da tramitación anticipada das diferentes liñas de subvención, condicionada en todo caso, á aprobación definitiva do presente Plan Estratéxico de Subvencións.

B) Principios inspiradores da presente planificación estratéxica

A vixente normativa reguladora das actuacións das administracións públicas en xeral e, en particular no que atinxe ás competencias das deputacións provinciais –*Lei 5/1997 de administración local de Galicia e Lei 7/1985, reguladora das bases do réxime local*– establece unha serie de principios que veñen constituír a expresión formal dos elementos definidores do presente Plan Estratéxico de Subvencións, e que constitúen a formulación das directrices xerais que deben impregnar a execución da política de subvencións da Deputación. Xa que logo, os principios xerais en que se concretará a acción de fomento desta administración serán principalmente os seguintes:

- Igualdade, entendida como a non discriminación ou marxinación de cidadáns, administracións ou sectores.
- Solidariedade, entendendo a acción social como expresión da xustiza social, a redistribución e actuación dos recursos de forma equitativa e a discriminación positiva.
- Fomento da iniciativa social, dándolle especial importancia á colaboración das entidades privadas na xestión dos intereses que lle son propios.
- Transparencia, como a vontade desta Deputación por ter informados aos cidadáns e entidades locais das súas políticas de axudas e subvencións e de asignación dos recursos públicos.
- Cooperación entre administracións, entendida como a consecuencia do principio de corresponsabilidade na xestión dos fondos públicos.
- Garantía de bo funcionamento, regulando os requisitos, baremos obxectivos, competencias, mecanismos de participación e de control e avaliación e control das subvencións concedidas.

C) Obxectivos estratéxicos do Plan Estratéxico de Subvencións 2020-2023.

A elaboración do presente Plan Estratéxico de Subvencións debe concibirse como un exercicio que permita realizar unha auténtica planificación estratéxica das políticas públicas de contido subvencional desenvolvidas por esta.

Fronte unha concepción formal do PES, esta Deputación quere dotarse dunha auténtica ferramenta para conseguir unha maior eficacia no cumprimento dos obxectivos da actividade subvencional e unha maior eficiencia na asignación do gasto público, e para isto deben racionalizarse e, no seu caso, simplificarse, as actuacións subvencionais para desenvolver.

Tendo presente todo o anterior, a elaboración do PES pretende a consecución dos seguintes obxectivos xerais:

1. Dotar á Deputación dun instrumento de planificación das políticas públicas que teñan por obxecto o fomento dunha actividade de utilidade pública ou interese social relacionada coas materias da competencia desta.
2. Desde unha perspectiva económico-financeira, definir instrumentos de xestión máis uniformes no conxunto das diferentes áreas e servizos que permitan mellorar a eficacia e a eficiencia das subvencións.
3. Desde a perspectiva da transparencia, acceso á información pública e bo goberno, dar cumprimento á normativa aplicable nestas materias ante as novas obrigas de publicidade activa e pasiva impostas por esta.

Os obxectivos concretos ou específicos que se pretenden indícanse especificamente para cada liña do Plan.

D) Liñas de subvención do Plan Estratéxico de Subvencións 2020-2023

D.1. Cooperación ás obras e servizos de competencia municipal.

1.º Áreas de competencia afectadas e sectores aos que se dirixen as axudas

Esta liña, establecida no exercicio das competencias provinciais de coordinación dos servizos municipais e cooperación e asistencia a municipios outorgadas polo artigo 36.1. apartados a) e b) da Lei de bases de réxime local, afecta ás competencias municipais nos ámbitos dos servizos mínimos obrigatorios previstos no artigo 26 da Lei reguladora das bases do réxime local, dos servizos sociais, e outros servizos e investimentos relacionados con outras competencias municipais.

Non se recollen nesta liña as posibles subvencións a concellos e mancomunidades para accións culturais e deportivas, que se canalizarán a través das liñas específicas previstas no presente plan estratéxico.

O sector ao que se dirixen as axudas é exclusivamente ao das entidades locais da provincia (concellos, entidades locais menores, mancomunidades e consorcios).

2.º Obxectivos e efectos que se pretenden coa súa aplicación

Os obxectivos e efectos perseguidos co presente Plan Estratéxico, referidos ás principais áreas de competencia da Deputación Provincial, no ámbito da cooperación cos concellos e demais entidades locais, son os seguintes:

- a) Garantir un nivel mínimo de investimento en infraestruturas de titularidade municipal, en particular nas relacionadas cos servizos mínimos obrigatorios, incrementando o nivel de investimento dos últimos anos.
- b) Prestarlles axuda financeira aos concellos en situación de insuficiencia orzamentaria.
- c) Garantir o financiamento mínimo para o mantemento dos servizos sociais de titularidade municipal e dos puntos de atención á infancia.
- d) Fomentar as actuacións de xestión compartida de servizos públicos locais (en especial os servizos mínimos obrigatorios) a través de consorcios, mancomunidades ou outras...con especial atención a servizos públicos de carácter deficitario ou con especiais dificultades de financiamento.
- e) Fomento do emprego local e de actividades dirixidas á mocidade dos respectivos concellos da provincia.

3.º Prazo necesario para a súa consecución

A concesión das subvencións correspondentes a esta liña de actuación deberá completarse como máximo antes do 1 de decembro do ano correspondente, sen prexuízo dos menores prazos establecidos nos plans, programas ou convenios específicos que a integran. A execución das actuacións subvencionadas deberá realizarse integramente nos exercicios que correspondan. Non obstante o anterior, a execución de actuacións consistentes en investimentos poderá adiarse, sempre que concorra causa xustificativa, ata a data que se determine.

4.º Custos previsibles para a súa realización e fontes de financiamento

a) Custos previsibles:

Os importes previstos inicialmente para esta liña de subvencións no orzamento do 2020, recóllense nos capítulos IV e VII do orzamento. No capítulo IV prevense como accións principais os programas de cooperación para os concellos relativos ao fomento do emprego ou o de actividades dirixidas á mocidade. No capítulo VII recóllese o plan provincial de

cooperación ás obras e servizos municipais, como principal ferramenta de cooperación cos concellos da provincia e un importe inicial de 4.716.000,00 €, dos cales 4.440.000,00 € destinados á execución material de obras e 276.000,00 € destinados a servizos complementarios á execución das devanditas obras.

Nos sucesivos exercicios obxecto da presente planificación (2021, 2022 e 2023) o obxectivo é manter e, na medida do posible ampliar, a consignación orzamentaria da presente liña, a cal se considera esencial en termos cualitativos e cuantitativos.

b) Fontes de financiamento:

As achegas serán realizadas exclusivamente con fondos propios da Deputación Provincial. Non obstante, as entidades locais beneficiarias poderán complementar o financiamento das actuacións subvencionadas con achegas financiadas, ben sexa con fondos propios municipais, ben con fondos obtidos doutras administracións públicas ou da Unión Europea.

5.º Plan de acción

As subvencións correspondentes a esta liña xestionaranse a través dos seguintes instrumentos (e doutros que se poidan incorporar por ter encaixe nel):

I. Plan Provincial de Cooperación ás Obras e Servizos Municipais e de Rede Viaria Provincial

A través deste plan, canalizaranse subvencións destinadas a investimentos municipais relacionados cos servizos mínimos obrigatorios establecidos no artigo 26 da Lei de bases de réxime local, así como as subvencións para investimentos relacionados con outros servizos municipais. Ademais, o plan, se así se acorda, preverá a posibilidade de que os concellos en situación de insuficiencia orzamentaria destinen parte da subvención á amortización da súa débeda ou a gastos correntes relacionados cos servizos mínimos obrigatorios.

O plan conterá tamén unha achega destinada á entidade local menor de Berán.

A aprobación definitiva das bases do referido plan provincial xa foi obxecto de publicación no BOP núm. 254 de data 05.11.2019.

II. Convenio de cooperación coa Xunta de Galicia, a FEGAMP e os concellos que dispoñen de grupos de emerxencias supramunicipais.

A través deste convenio subvencionarase o mantemento dos GES nos concellos da provincia que dispoñan deste servizo.

Destínanse a esta finalidade 900.666,66 euros, consignados no orzamento xeral para o exercicio 2020.

As subvencións tramitaranse nos termos previstos no convenio plurianual aprobado polo Pleno da Deputación.

Para o resto do período obxecto da presente planificación manterase o compromiso de financiamento deste servizo municipal no marco e nos termos do convenio asinado.

III. Programa provincial de cooperación cos concellos para a realización de actuacións de limpeza das marxes das redes viarias municipal e provincial

Este programa de cooperación para a contratación de choferes de máquinas rozadoras xa se veu levando a cabo nos exercicios orzamentarios precedentes. O obxectivo deste plan é paliar a insuficiencia financeira dos concellos para a realización dos traballos de limpeza das marxes das estradas municipais e o cumprimento das obrigas establecidas a este respecto pola lexislación de protección contra incendios forestais (normativa que non preveu dotación orzamentaria ningunha para as entidades locais). Máis en concreto, o programa subvenciona a contratación de persoal para o manexo da maquinaria rozadora precisa para estes labores de limpeza. Por razóns de eficiencia, o programa esixe que os concellos colaboren na limpeza das vías provinciais, como medio de optimizar os medios financeiros postos á súa disposición. Como consecuencia da aplicación da Ordenanza xeral de subvencións, a súa tramitación no período 2020-2023 deberá levarse a cabo conforme coas previsións do artigo 10 da Ordenanza xeral de subvencións, na modalidade de programas de cooperación en concorrencia non competitiva.

A aprobación inicial deste programa para o exercicio 2020 tivo lugar na sesión plenaria de data 29.11.2019. A dotación prevista neste programa, conforme co orzamento xeral para 2020, é de 350.000 euros, integramente financiados con fondos propios da Deputación Provincial.

IV. Programa provincial de cooperación cos concellos para o fomento do emprego.

Este programa de cooperación, en réxime de concorrencia non competitiva, ten como obxecto a contribución ao sostemento económico dos servizos de competencia municipal e da entidade local menor de Berán posibilitando o complemento dos recursos humanos necesarios co dito fin, tanto a través das figuras contractuais propias da lexislación laboral como a través de contratos administrativos ou nomeamento de persoal funcionario interino.

Como consecuencia da aplicación da Ordenanza xeral de subvencións, a súa tramitación no período 2020-2023 deberá levarse a cabo conforme cos previsións do artigo 10 da Ordenanza

xeral de subvencións, na modalidade de programas de cooperación en concorrencia non competitiva.

A aprobación inicial deste programa para o exercicio 2020 tivo lugar na sesión plenaria de data 29.11.2019. A dotación prevista neste programa, conforme co orzamento xeral para 2020, é de 1.830.000,00 €, integramente financiados con fondos propios da Deputación Provincial.

V. Programa provincial de cooperación cos concellos en materia de mocidade.

Este programa de cooperación, en réxime de concorrencia non competitiva, ten como obxecto contribuír ao financiamento das actividades desenvolvidas polos concellos da provincia e a entidade local menor de Berán en prol da mocidade.

Como consecuencia da aplicación da Ordenanza xeral de subvencións, a súa tramitación no período 2020-2023 deberá levarse a cabo conforme cos previsións do artigo 10 da Ordenanza xeral de subvencións, na modalidade de programas de cooperación en concorrencia non competitiva.

A aprobación inicial deste programa para o exercicio 2020 tivo lugar na sesión plenaria de data 29.11.2019. A dotación prevista neste programa, conforme co orzamento xeral para 2020, é de 549.000,00 €, integramente financiados con fondos propios da Deputación Provincial.

VI. Programa provincial de asistencia técnica, económica e xurídica aos concellos e mancomunidades en materia de servizos sociais comunitarios (BenOurense).

Este programa – continuación dos xa executados nos exercicios anteriores– canaliza as subvencións tanto para o financiamento do servizo de axuda no fogar básico (destinado a persoas que non teñen efectivamente recoñecido o estatuto de dependencia) como para a contratación de persoal técnico dos equipos municipais de servizos sociais comunitarios.

A través deste programa lévanse a cabo as accións de cooperación económica e técnica que lle corresponde desenvolver á Deputación Provincial de Ourense en virtude das competencias atribuídas polos artigos 109.1.b) da Lei 5/1997, do 22 de xullo, de administración local de Galicia, 63 da Lei 13/2008, do 3 de decembro, de servizos sociais de Galicia e 31 do Decreto 99/2012, do 16 de marzo, polo que se regulan os servizos sociais comunitarios e o seu financiamento.

A dotación total do programa para o exercicio 2020, segundo o previsto no orzamento xeral da Deputación, é de 1.200.000 de euros, que se dedican a subvencionar o servizo básico de

axuda no fogar e a contratación de persoal técnico dos equipos municipais de servizos sociais comunitarios, de acordo co establecido na normativa antedita

O programa será aprobado polo Pleno da Deputación en decembro de 2019 ou ao longo do primeiro trimestre de 2020, tras a súa tramitación conforme co previsto no artigo 10 da Ordenanza xeral de subvencións, de tal xeito que os concellos e mancomunidades poidan completar o trámite de adhesión ao programa no mes de febreiro. A adxudicación das subvencións levarase a cabo na modalidade de concorrência non competitiva, determinándose a contía das subvencións en virtude de parámetros obxectivos relativos aos servizos sociais prestados polos concellos e mancomunidades beneficiarios.

VII. Programa provincial de asistencia aos concellos e mancomunidades para a xestión de puntos de atención á infancia e outros servizos de atención á infancia (BenOurense Infancia).

Este programa ten por obxecto canalizar as subvencións para gastos de mantemento de puntos de atención á infancia de carácter municipal.

O programa será aprobado polo Pleno da Deputación no primeiro trimestre de 2020, previa a súa tramitación conforme co previsto no artigo 10 da Ordenanza xeral de subvencións. A adxudicación das subvencións levarase a cabo na modalidade de concorrência non competitiva, determinándose a contía das subvencións en virtude de parámetros obxectivos relativos aos puntos de atención á infancia xestionados polos concellos e mancomunidades beneficiarios. No orzamento de 2020 establécese unha aplicación inicial de 250.000 euros.

VIII. Programa provincial de cooperación cos concellos para a elaboración de plans de emerxencia por seca.

O obxecto deste programa é a cooperación económica cos concellos para a elaboración de plans de emerxencia por seca, destinado exclusivamente aos concellos da provincia de Ourense que accederon ao cofinanciamento da administración autonómica, en virtude da convocatoria publicada no DOG n.º 118, do 24 de xuño de 2019, e co fin de complementar as axudas concedidas a aqueles coa dita finalidade por Augas de Galicia. O obxectivo do programa é que as entidades locais beneficiarias dispoñan dun instrumento básico de planificación para xestionar os posibles episodios de seca, de tal xeito que se garanta o abastecemento á poboación e se fomente o emprego eficiente dos recursos hídricos.

Prevese a convocatoria deste Programa de cooperación nos exercicios seguintes, e a súa dotación orzamentaria para o exercicio 2020 é de 100.000 euros.

IX. Subvencións a outras entidades intermunicipais para o financiamento de servizos públicos deficitarios ou de difícil financiamento.

Neste apartado consígnanse no orzamento xeral subvencións nominativas ás mancomunidades de Verín, Ourense, Celanova, Ribeiro e O Carballiño por importe de 20.000,00 € respectivamente, e destinadas ao cofinanciamento dos seus gastos de mantemento.

En función das necesidades que se detecten e das dispoñibilidades orzamentarias poderían implementarse outras axudas nesta liña.

X. Convenios de cooperación coa Confederación Hidrográfica Miño-Sil e concellos da provincia para diversas actuacións en infraestruturas (abastecemento, saneamento e/ou depuración).

Trátase de diversas subvencións reguladas en distintos convenios, cun importe total de 150.000 euros, cuxa beneficiaria é a Confederación Hidrográfica do Miño-Sil, pero cuxo destino é o investimento en infraestruturas municipais, razón pola que se inclúe na liña de cooperación ás obras e servizos municipais. Estas subvencións complementan o seu financiamento coas achegas da Confederación Hidrográfica con fondos propios e da Unión Europea para a creación destas infraestruturas. A regulación e condicións aplicables a estas subvencións establécese nos convenios de cooperación a través dos que se concederon, e noutros casos, establecerase nos convenios que se poidan subscribir.

XI. Subvencións nominativas a concellos para o cofinanciamento de investimentos municipais.

Prevense no orzamento de 2020 unha serie de subvencións nominativas a concellos da provincia para o cofinanciamento de diversos investimentos necesarios para a prestación de servizos municipais.

En función das solicitudes e necesidades detectadas na provincia prevese que esta liña se manteña ao longo do período da presente planificación.

Con esta liña prevese acoller determinadas demandas que non teñan encaixe noutras liñas ou formas de financiamento.

XII. Subvencións nominativas a concellos para gastos de mantemento de servizos municipais

Prevense no orzamento de 2020 unha serie de subvencións nominativas a concellos da provincia para o cofinanciamento de diversos servizos municipais.

En función das solicitudes e necesidades detectadas na provincia prevese que esta liña se manteña ao longo do período da presente planificación.

Con esta liña prevese acoller determinadas demandas que non teñan encaixe noutras liñas ou formas de financiamento.

D.2. Fomento da cultura

1.º Áreas de competencia afectadas e sectores aos que se dirixen as axudas

Esta liña de subvención enmárcase na competencia provincial prevista no artigo 118.d) da Lei 5/1997, do 22 de xullo, de administración local de Galicia.

Os sectores aos que se dirixen as axudas son as entidades locais da provincia, a universidade pública, e a diferentes entidades e institucións culturais de Galicia sen ánimo de lucro.

2.º Obxectivos e efectos que se pretenden coa súa aplicación

Pódense sintetizar nos seguintes:

- Contribuír á realización de actividades culturais e recreativas no conxunto da provincia, con especial atención ao fomento das artes escénicas e musicais e ás actividades culturais no ámbito universitario, como elemento necesario para a configuración dunha oferta cultural e de ocio plural e sostible, aberta ao público en xeral.
- Colaborar coa Universidade de Vigo garantindo a realización dun amplo programa de actividades culturais e de extensión universitaria no Campus de Ourense.
- Contribuír ao sostemento da Real Academia Galega, así como a determinadas actividades culturais de carácter senlleiro (actividades de fundacións e outras entidades).
- Contribuír ao sostemento de fundacións culturais de gran importancia e arraigo na provincia, como as Fundacións Otero Pedrayo, Curros Enríquez, Carlos Casares ou Blanco Amor.
- Colaborar co financiamento de actividades culturais promovidas por entidades culturais como son as do Pen Club de Galicia, a Coral de Ruada, o Liceo de Ourense ou Sarabela Teatro.

3.º Prazo necesario para a súa consecución

A concesión das subvencións correspondentes a esta liña de actuación deberá completarse como máximo e como regra xeral antes do 31 de xullo do ano que corresponda, sen prexuízo dos menores prazos establecidos nas bases reguladoras ou convenios específicos que a integran. No caso das subvencións para fomento de actividades escénicas e musicais, a concesión das subvencións deberá completarse como máximo antes do 1 de decembro. A execución das actuacións subvencionadas deberá realizarse integramente no exercicio que corresponda.

4.º Custos previsibles para a súa realización e fontes de financiamento

O custo estimado desta liña de acción no orzamento de 2020 supera os 600.000 euros.

As subvencións financiaranse integramente con fondos propios da Deputación Provincial, sen prexuízo das achegas realizadas polos propios beneficiarios, ou ben con fondos doutras administracións públicas captados por estes.

5.º Plan de acción

As subvencións que integran esta liña instrumentaranse a través dos seguintes procedementos:

I. Concurso de subvencións para fomento das artes escénicas e musicais (Plan Tarazona)

A finalidade destas subvencións é o financiamento de actuacións escénicas e musicais de carácter gratuíto e abertas ao público en xeral, promovidas por entidades locais, entidades sen ánimo de lucro ou comisións de festexos.

Igualmente, poderán ser obxecto de financiamento a realización de festivais, ciclos, mostras ou actividades análogas relativas a actuacións escénicas e musicais, promovidas por entidades locais ou entidades sen ánimo de lucro.

O procedemento será o de concorrencia non competitiva, permitíndolles aos beneficiarios (entidades locais, asociacións veciñais, comisións de festexos) seleccionar libremente a actividade escénica ou musical que desexen, de entre a oferta integrada por todas as agrupacións artísticas que se adhiran ao sistema. As bases garantirán unha estrita neutralidade da administración pública na selección dos espectáculos subvencionados, quedando determinada a concesión de subvencións exclusivamente pola orde cronolóxica de solicitudes e a dispoñibilidade das agrupacións artísticas adheridas.

As bases do concurso deberán ser aprobadas pola Xunta de Goberno no primeiro trimestre do exercicio.

No caso do financiamento de festivais, ciclos, mostras ou actividades análogas, o procedemento será o dun concurso para a concesión de subvencións que poderá admitir a modalidade de concorrencia competitiva ou non competitiva.

A dotación prevista no orzamento de 2020 para esta finalidade é de 200.000 euros.

II. Programa de cooperación cos concellos para o cofinanciamento da rede provincial de espazos culturais e programación coordinada de actividades a nivel provincial (REAOU).

O obxecto deste Programa de cooperación é o de cofinanciar e cooperar conxuntamente cos concellos de menos de 20.000 habitantes no fomento e a difusión das artes escénicas e da música na provincia, a través da Rede de espazos culturais (auditorios, casas de cultura e centros multiusos) da provincia de Ourense, sempre que dispoñan dun espazo axeitado para o

desenvolvemento da actividade escénica e asuman a programación de, polo menos, un espectáculo bimestral nos ditos espazos.

O importe previsto no orzamento de 2020 para este programa é de 150.000 euros

III. Subvencións para festivais e actos similares de marcado carácter senlleiro na provincia.

Establécese a posibilidade de instrumentalizar a través de diferentes subvencións nominativas a entidades locais para a organización de festivais e actos culturais análogos de marcado carácter senlleiro e consolidado no ámbito cultural da provincia.

IV. Concurso de subvencións para realización de actividades culturais e recreativas

A finalidade destas subvencións é o financiamento da realización de todo tipo de actividades culturais ou recreativas, promovidas por entidades locais e entidades sen ánimo de lucro.

O procedemento será o de concorrencia competitiva. Os criterios de valoración incentivarán aquelas actividades que contén cun maior impacto social, así como a capacidade de autofinanciamento da entidade beneficiaria; igualmente, incentivaranse as actividades culturais que se estimen de especial interese polo seu carácter senlleiro, especial calidade ou pola súa incidencia na protección de tradicións culturais da provincia.

As bases do concurso deberán ser aprobadas pola Xunta de Goberno no primeiro cuadrimestre do exercicio.

A dotación prevista no orzamento de 2020 para esta finalidade é de 100.000 euros para concellos e de 120.000 para outras entidades.

V. Convenio coa Universidade de Vigo para a realización de actividades culturais

A través dun convenio coa Universidade de Vigo regularase a concesión dunha subvención nominativa, por importe máximo de 220.000 euros, destinada a financiar a realización de actividades culturais e de extensión universitaria no campus de Ourense. Poderase incluír entre as finalidades subvencionadas a realización de programas de apoio á mobilidade dos estudantes do campus e a grupos de investigación do Campus de Ourense.

As concretas condicións da subvención regularanse no convenio, que deberá ser obxecto de negociación e aprobación pola Xunta de Goberno no primeiro trimestre do ano que corresponda.

VI. Subvencións nominativas a outras entidades.

Detállanse a continuación algunhas das previstas no orzamento aprobado para o orzamento do ano 2020.

- Real Academia Galega

- Achega ao premio Otero Pedrayo
- Fundación Eduardo Blanco Amor
- Fundación Otero Pedrayo
- Pen Clube de Galicia
- Coral da Ruada
- Fundación Insúa dos Poetas
- Fundación Curros Enríquez
- Fundación Carlos Velo
- Liceo de Ourense

En función das solicitudes e necesidades detectadas na provincia prevese que esta liña se manteña ao longo do período da presente planificación, para estas e/ou outras entidades, co obxectivo de acoller determinadas demandas que non teñan encaixe noutras liñas ou formas de financiamento.

D.3. Fomento do deporte

1.º Áreas de competencia afectadas e sectores aos que se dirixen as axudas

Esta liña de subvención enmárcase na competencia prevista no artigo 118.d) da Lei 571997, do 22 de xullo, de administración local de Galicia, así como na Lei do deporte de Galicia.

Os sectores aos que se dirixen as axudas son as entidades locais, entidades deportivas sen ánimo de lucro, sociedades anónimas deportivas, asociacións veciñais e deportistas individuais cualificados.

2.º Obxectivos e efectos que se pretenden coa súa aplicación

Pódense resumir nos seguintes:

- Garantir o mantemento da actividade das principais entidades deportivas de Ourense, con especial atención ao deporte de base.
- Garantir a existencia dunha actividade plural e diversificada de actividades deportivas na provincia de Ourense, especialmente de actividades deportivas abertas ao deporte de base (con programas como o das Copas Deputación) e actividades abertas ao público en xeral, baseadas nos conceptos de “deporte para todos” e “deporte – saúde”.
- Promover e incentivar a actividade dos deportistas individuais ourensáns especialmente destacados nas súas disciplinas deportivas.

3.º Prazo necesario para a súa consecución

A concesión das subvencións correspondentes a esta liña de actuación deberá completarse como máximo antes do 31 de xullo do ano que corresponda, sen prexuízo dos menores prazos establecidos nas bases reguladoras ou convenios específicos que a integran, e da especialidade na modalidade de eventos deportivos xa que se implementará un modelo de bases que permita a solicitude de eventos en dúas convocatorias, ao longo do ano.

4.º Custos previsibles para a súa realización e fontes de financiamento

A contía destinada a esta liña de subvencións nos orzamentos de 2020 achégase a 1.000.000,00 de euros, financiados integramente con fondos propios da Deputación Provincial de Ourense, sen prexuízo da posibilidade de que os beneficiarios complementen esta achega con fondos propios ou obtidos doutras administracións públicas.

5.º Plan de acción

As subvencións que integran esta liña de actuación instrumentaranse a través das seguintes accións:

I. Concurso de subvencións a entidades deportivas

A finalidade deste concurso é a concesión de subvencións a entidades deportivas sen ánimo de lucro para o sostemento do seus gastos de funcionamento e, máis en concreto, dos gastos derivados da súa participación nas competicións deportivas oficiais. A dotación para estas finalidades nos orzamentos de 2020 é de 400.000 euros.

As bases reguladoras e a convocatoria deste concurso deberá aprobalas a Xunta de Goberno no primeiro trimestre de 2020. As bases terán en conta, entre outros criterios de valoración, a realización de actividades de deporte base, feminino e de discapacitados, e así como a incidencia social da actividade do club e a racionalidade da súa xestión económica, con especial atención á súa capacidade de financiamento con cargo a ingresos privados (coas de socios, patrocinios privados...).

As subvencións correspondentes a esta acción concederanse mediante procedemento de concorrencia competitiva.

II. Subvención ao Club Ourense Baloncesto.

A finalidade desta subvención é contribuír ao sostemento do Club Ourense Baloncesto. Non obstante, a subvención quedará condicionada á realización de actividades de fomento do deporte base por parte da entidade beneficiaria.

Prevenise 216.000 euros para esta finalidade, cantidade idéntica á de exercicios anteriores. A subvención concederáse como subvención nominativa en atención á especial importancia desta entidade deportiva na provincia.

III. Subvención á Asociación Deportiva-Cultural Ribeiro.

A finalidade desta subvención é contribuír ao sostemento da Asociación Deportiva-Cultural Ribeiro. Non obstante, a subvención quedará condicionada á realización de actividades de fomento do deporte base por parte da entidade beneficiaria.

Prevenise 28.200 euros para esta finalidade.

A subvención concederáse como subvención nominativa, en atención á categoría competitiva na que milita o equipo de balonmán sénior masculino (1ª división estatal) Carnes do Ribeiro-Ourense provincia termal.

IV. Subvención ao Rally de Ourense

A finalidade desta subvención é contribuír á realización deste importante evento, de enorme importancia económica, social e deportiva. Prevese unha subvención por importe de 53.000 euros, que se concederá con carácter nominativo.

V. Concurso de subvencións para as Copas Deputación

A finalidade desta subvención é garantir o mantemento das Copas Deputación, como competición deportiva de enorme tradición na provincia e orientada fundamentalmente cara ao deporte de base. A dotación para estas finalidades nos orzamentos de 2020 é de 127.5000 euros.

As bases reguladoras e a convocatoria deste concurso deberá aprobalas a Xunta de Goberno no primeiro trimestre de 2020. As bases terán en conta, entre os criterios de valoración, a incidencia social da competición, a súa orientación ao deporte de base e a celebración en municipios diferentes da capital, entre outros factores.

As subvencións correspondentes a esta acción concederanse ordinariamente mediante o procedemento de concorrència competitiva, con excepción das Copas Deputación de fútbol e fútbol sala, que polo seu arraigo e dimensión nesta provincia, serán obxecto de financiamento a través de sendas subvencións nominativas nos termos que estableza o pleno da Deputación.

VI. Concurso de subvencións para eventos deportivos

A finalidade destas subvencións é contribuír ao mantemento dunha actividade deportiva ampla, orientada ao público en xeral e baseada principalmente nos conceptos de deporte –

saúde e deporte para todos. As accións subvencionadas poderán ser promovidas polos concellos, entidades deportivas, entidades sen ánimo de lucro ou asociacións veciñais.

A dotación para estas finalidades nos orzamentos de 2020 é de 60.000 euros para o fomento do deporte polos concellos e de 70.000 euros para outras entidades.

As bases reguladoras e a convocatoria deste concurso deberá aprobalas a Xunta de Goberno no primeiro trimestre de 2020.

VII. Concurso de subvencións a deportistas individuais cualificados

A finalidade destas subvencións é incentivar a actividade dos deportistas ourensáns individuais que se destacasen especialmente na temporada deportiva, tendo en conta ademais o conxunto da súa traxectoria.

A dotación para estas finalidades nos orzamentos de 2020 é de 30.000 euros.

As bases reguladoras e a convocatoria deste concurso para o ano 2020 serán aprobadas pola Xunta de Goberno no mes de decembro do presente ano 2019.

As subvencións correspondentes a esta acción concederanse mediante procedemento de concorrencia competitiva.

VIII. Outras subvencións nominativas.

En función das solicitudes e necesidades detectadas na provincia prevese que esta liña se manteña ao longo do período da presente planificación, co obxectivo de acoller determinadas demandas que non teñan encaixe noutras liñas ou formas de financiamento.

D.4. Reto demográfico.

1.º Áreas de competencia afectadas e sectores aos que se dirixen as axudas

Esta liña de subvención enmárcase na competencia xeral prevista no artigo 109 d) da Lei de administración local de Galicia do fomento e administración dos intereses peculiares da provincia.

Os sectores aos que se dirixen son, por unha banda, aos veciños e veciñas da provincia que durante o ano 2020 e sucesivos teñan un fillo ou filla , ou teña constituída a tutela ou adopción dun neno ou nena (Programa CheogOU), e por outra as persoas físicas que leven a cabo proxectos empresariais e/ou de auto emprego en municipios rurais en declive demográfico da provincia (Programa EmpredOU).

Ademais do anterior, en moitas das bases de subvencións dirixidas ás EELL da provincia introdúcese como criterio de ponderación a “prioridade demográfica dos concellos”, a cal se

obtéñ en función dos criterios de poboación actual, situación xeográfica, perda/suba de poboación, densidade demográfica, índice de avellentamento e taxa de natalidade.

2.º Obxectivos e efectos que se pretenden coa súa aplicación

Como obxectivo inmediato está o de incorporar na regulación das subvencións provinciais a “perspectiva de reto demográfico”, facendo a esta Deputación participe da Estratexia Nacional fronte o reto demográfico e seguindo algunhas das medidas xurdidas do Documento de Acción elaborado pola Comisión de despoboamento constituída no seo da FEMP.

O obxectivo final é o de frear o descenso de poboación na provincia e, particularmente nos concellos máis afectados, tentando fomentar a natalidade e o emprendemento rural como elementos que axuden a fixar poboación.

3.º Prazo necesario para a súa consecución

A concesión das subvencións realizarase ao longo de todo o ano 2020, e sucesivos, se hai continuidade nos orzamentos provinciais.

4.º Custos previsibles para a súa realización e fontes de financiamento

A dotación total para estas finalidades no exercicio 2020 é de 400.000 euros para o Programa ChegOu e de 2.025.000 euros para o Programa EmprendOu (cofinanciado á súa vez con fondos do Fondo Social Europeo).

5.º Plan de acción

A concesión das subvencións incluídas nesta liña levarase a cabo a través dos seguintes programas:

I. Programa ChegOU.

Constitúe o obxecto deste Programa a regulación das axudas que a Deputación de Ourense, a través da Área de Benestar, lle outorgará, mediante concorrencia non competitiva, á persoa que durante o ano 2020 teña un fillo ou filla, teña constituída a tutela ou adopción dun neno ou nena.

A subvención á que poderán acceder as persoas solicitantes será a que lle corresponda segundo a consideración, en grado, do concello en cuxo rexistro civil conste inscrito o/a menor que motiva a solicitude. As contías serán as seguintes: para concellos de Grado 0, Grado 1, e Grado 2: 300,00 €, e para concellos de Grado 3: 500,00 €.

A dotación total do Programa para o exercicio 2020 é de 400.000 euros.

II. Programa EmprendOU.

Constitúe o obxecto deste Programa a concesión das subvencións que outorgue a Deputación Provincial de Ourense, en réxime de concorrència non competitiva, a persoas físicas que leven a cabo proxectos empresariais e/ou de auto emprego en municipios rurais en declive demográfico da provincia de Ourense durante o exercicio 2020.

A subvención á que poderán acceder as persoas solicitantes consistirá nunha axuda económica equivalente ao 75% do salario mínimo interprofesional por cada mes de exercicio efectivo da actividade subvencionada, cun mínimo de 6 meses e un máximo de 12 meses. Estes períodos terán que cumprirse antes do 31 de decembro de 2020, data límite ata a que se subvencionarán os proxectos presentados.

O importe total do Programa, cofinanciado con fondos do Fondo Social europeo, é de 2.025.000 euros para os exercicios 2019 e 2020.

D.5 Fomento do benestar social

1.º Áreas de competencia afectadas e sectores aos que se dirixen as axudas

Esta liña de subvención enmárcase na competencia prevista no artigo 118 da Lei 5/1997, do 22 de xullo, de administración local de Galicia, e 36.1. d) e e) da Lei reguladora das bases de réxime local, ao considerar que o fomento da prestación de servizos sociais constitúe un interese peculiar da provincia de Ourense e contribúe ao seu desenvolvemento social, dadas as súas características sociais e demográficas, interese especificamente definido en desenvolvemento das previsións xenéricas das normas citadas polo artigo 4.2.f) da Ordenanza xeral de subvencións.

Os sectores aos que se dirixen son as entidades sen ánimo de lucro que presten servizos sociais na provincia, así como a persoas físicas beneficiarias do Programa de termalismo social.

Quedan fóra desta liña, por ter sido xa incluídos noutras precedentes, os programas de cooperación cos concellos en materia de servizos sociais e o programa de fomento da natalidade.

2.º Obxectivos e efectos que se pretenden coa súa aplicación

O obxectivo fundamental que persegue esta liña de subvencións é contribuír ao mantemento dos servizos sociais (complementarios dos xestionados polo sector público) que son prestados na provincia por entidades sen ánimo de lucro. Complementariamente, resérvase unha partida para posibles investimentos por parte deste tipo de entidades.

Así mesmo, establécese unha nova liña de acción de fomento da natalidade a través do Plan Provincial de apoio á natalidade.

3.º Prazo necesario para a súa consecución

A concesión das subvencións correspondentes a esta liña de actuación deberá completarse como regra xeral e como máximo antes do 31 de xullo do ano que corresponda, sen prexuízo dos menores prazos establecidos nas bases reguladoras ou convenios específicos que a integran. A execución das actuacións subvencionadas deberá realizarse integramente no exercicio.

4.º Custos previsibles para a súa realización e fontes de financiamento

A dotación total prevista para esta liña é de máis de 300.000 euros, dos que a maior parte (300.000 euros) irán destinados á concesión de subvencións a entidades sen ánimo de lucro para a prestación de servizos sociais mediante procedementos de concorrência competitiva.

5.º Plan de acción

A concesión das subvencións incluídas nesta liña instrumentarase a través das seguintes accións:

I. Concurso de subvencións para entidades sen ánimo de lucro que presten de servizos sociais

Esta acción consistirá na concesión de subvencións a entidades sen ánimo de lucro que presten servizos sociais na provincia de Ourense, e dotarase con 300.000 euros. As subvencións concederanse mediante procedementos de concorrência competitiva, e as bases reguladoras deberán ser aprobadas pola Xunta de Goberno no primeiro trimestre do ano que corresponda. Os criterios de valoración terán en conta, entre outros factores, a complementariedade dos servizos prestados cos xestionados polas administracións públicas e a súa incidencia social no territorio e nos colectivos afectados.

II. Fondo para subvencións de emerxencia social

Os orzamentos de 2020 reservan unha partida de 15.000 euros sen adscrición específica. Esta partida poderá destinarse a subvencións de emerxencia social, en función de necesidades que poidan detectarse ao longo do exercicio, que poderán tramitarse como subvencións nominativas ou directas, sempre que se dean os supostos previstos en cada caso pola Ordenanza xeral de subvencións. Esta partida poderá empregarse, igualmente, para atender obrigas sobrevidas como consecuencia da estimación de recursos interpostos contra os actos de concesión de subvencións do exercicio anterior.

III. Concurso de subvencións para fomento do termalismo social.

Mediante esta acción, concederanse subvencións a persoas físicas para a realización de estancias, e recepción de tratamentos terapéuticos (dermatolóxicos, respiratorios, e reumatolóxicos) en establecementos balnearios da provincia de Ourense.

O procedemento será xestionado pola Deputación, mediante procedementos de concorrència pública, efectuándose diversas convocatorias ao ano en función dos períodos de actividade dos establecementos balnearios. Os establecementos balnearios terán a consideración de entidades colaboradoras, ben directamente, ou ben a través das súas asociacións representativas.

As bases reguladoras da concesión das axudas terán en conta criterios de idade e capacidade económica dos beneficiarios.

IV. Outras subvencións nominativas.

En función das solicitudes e necesidades detectadas na provincia prevese que esta liña se mantéña ao longo do período da presente planificación, co obxectivo de acoller determinadas demandas que non teñan encaixe noutras liñas ou formas de financiamento.

D.6 Fomento do desenvolvemento económico da provincia

1.º Áreas de competencia afectadas e sectores aos que se dirixen as axudas

Esta liña de subvencións enmárcase na competencia provincial de cooperación no fomento do desenvolvemento económico da provincia, prevista no artigo 36.1.d) da Lei de bases de réxime local. O exercicio destas competencias provinciais instrumentase a través do Instituto Ourensán de Desenvolvemento Económico e Social (Inorde) e desde a propia Deputación Provincial.

Os sectores afectados por esta liña serán os concellos e o sector empresarial da provincia de Ourense en xeral, en particular o que ten por obxecto a produción, promoción e distribución de produtos propios da provincia non susceptibles de deslocalización e o sector termal.

2.º Obxectivos e efectos que se pretenden coa súa aplicación

Poden resumirse nos seguintes:

- Contribuír ao crecemento da economía provincial mediante a concesión de subvencións aos concellos para a promoción de produtos propios da provincia non susceptibles da deslocalización.
- Contribuír ao desenvolvemento económico da provincia, coas achegas á Fundación Expourense (da que o Inorde é socio fundador), para o financiamento de feiras e exposicións que celebren.

- Contribuír ao desenvolvemento do sector audiovisual galego mediante o cofinanciamento de producións que poñan en valor o valor turístico, patrimonial ou paisaxístico da provincia.
- Contribuír á promoción do comercio ourensán mediante a concesión de subvención á Federación de Comercio de Ourense para actividades propias da dita entidade e á Asociación Centro Comercial Aberto de Ourense.

3.º Prazo necesario para a súa consecución

A concesión das subvencións correspondentes a esta liña de actuación deberá completarse como regra xeral e como máximo antes do 1 de decembro do ano que corresponda, sen prexuízo dos menores prazos establecidos nas bases reguladoras ou convenios específicos que a integran. A execución das actuacións subvencionadas deberá realizarse integramente no exercicio.

4.º Custos previsibles para a súa realización e fontes de financiamento

O importe destinado a estas finalidades nos orzamentos da Deputación Provincial e do Inorde para o exercicio 2020 supera os 300.000,00 €.

O financiamento destes importes realízase con fondos propios da Deputación e do Inorde, sen prexuízo da posibilidade de que os beneficiarios complementen estas achegas con fondos propios ou procedentes doutras administracións públicas.

5.º Plan de acción

Esta liña de subvencións instrumentarase a través das seguintes accións:

I. Concurso de subvencións a concellos para accións de promoción de produtos propios da provincia de Ourense

Mediante esta acción, concederanse subvencións a concellos para a realización de accións de promoción de produtos propios da provincia non susceptibles de deslocalización. O procedemento de concesión de subvencións será xestionado polo Inorde, mediante concorrencia competitiva, debendo aprobarse as bases reguladoras do concurso no primeiro cuadrimestre do ano que corresponda. As bases terán en conta a incidencia socioeconómica das accións previstas. A dotación orzamentaria para esta acción será de 75.000 euros.

II. Subvención á Fundación Feiras e Exposicións de Ourense (Expourense).

Sen prexuízo da achega da cota correspondente a esta Fundación, da que o Inorde é socio fundador, preténdese colaborar cos obxectivos desta Fundación no ámbito da promoción de actividades industriais, comerciais, técnicas agrícolas, gandeiras, gastronómicas, turísticas ou

culturais en Ourense, de ámbito internacional, nacional, autonómico, provincial ou local, tanto de carácter xeral como monográfico, enfocada a determinados sectores profesionais ou abertas ao público en xeral, polo que se poderán implementar subvencións a esta Fundación para a realización de actividades concretas de interese provincial.

III. Subvencións nominativas ao sector audiovisual.

Prevense nos orzamentos unha serie de subvencións nominativas destinadas a cofinanciar a produción de pezas (longametraxes, curtametraxes e/ou documentais) cuxa gravación se realiza na provincia de Ourense, coa finalidade de por un lado, potenciar e poñer en valor a riqueza turística, patrimonial e/ou paisaxística da provincia e, por outro lado, darlle pulo ao emerxente sector audiovisual galego.

IV. Outras subvencións nominativas do INORDE para o desenvolvemento económico.

Por esta vía poderán subvencionarse accións que non teñan encaixe noutras convocatorias e que polo seu carácter singular supoñan un pulo e se consideren unha aposta polo desenvolvemento económico provincial, como son as previstas no orzamento deste organismo autónomo destinadas á Federación de Comercio de Ourense para actividades propias da dita entidade e á Asociación Centro Comercial Aberto de Ourense, así como outras que se poidan implementar ao longo do período da planificación.

D.7 Fomento do asociacionismo veciñal

1.º Áreas de competencia afectadas e sectores aos que se dirixen as axudas

Esta liña de subvencións enmárcase na competencia provincial de fomento dos intereses peculiares da provincia, prevista no artigo 118.d) da Lei de administración local de Galicia e 36.1.e) da Lei de bases de réxime local.

Os sectores afectados por esta liña serán as asociacións veciñais.

2.º Obxectivos e efectos que se pretenden coa súa aplicación

Potenciar o movemento veciñal, a través das súas asociacións, como instrumento de participación cidadá ante as administracións locais e como entidades xestoras de actividades de interese social, deportiva, cultural ou medioambiental.

3.º Prazo necesario para a súa consecución

A concesión das subvencións correspondentes a esta liña de actuación deberá completarse como regra xeral e como máximo antes do 1 de decembro do ano que corresponda, sen prexuízo dos menores prazos establecidos nas bases reguladoras ou convenios específicos que

a integran. A execución das actuacións subvencionadas deberá realizarse integramente no exercicio.

4.º Custos previsibles para a súa realización e fontes de financiamento

Existe unha previsión inicial de 50.000 € nos orzamentos para 2020, destinados ao financiamento dos gastos correntes das federacións de asociacións veciñais.

No primeiro semestre de 2020 habilitarase mediante unha modificación orzamentaria con cargo ao remanente de tesourería, unha partida de 100.000 € con destino ao financiamento de gastos de investimento de asociacións veciñais, mediante concurso público e con concorrencia competitiva.

O financiamento desta liña, en todo caso, realizarase con fondos propios da Deputación, e sen prexuízo da posibilidade de que os beneficiarios complementen estas achegas con fondos propios ou procedentes doutras administracións públicas.

5.º Plan de acción

Esta liña de subvencións instrumentarase a través de concursos de concesión de subvencións a federacións de asociacións veciñais por un lado e ás propias asociacións veciñais polo outro.

O procedemento poderá ser tanto o de concorrencia competitiva como o de concorrencia non competitiva, podendo tamén implementarse a través da concesión de subvencións de carácter nominativo, sempre que se respecten os límites establecidos na Ordenanza xeral de subvencións e se motiven estas. O importe inicial consignado no orzamento ascende aos 50.000 euros para o financiamento desta liña.

E) Réxime de seguimento e avaliación das diferentes liñas de subvencións do Plan Estratéxico de Subvencións 2020-2023

No primeiro cuadrimestre de cada exercicio, a Área de Administración Xeral emitirá un informe sobre o grao de execución do presente Plan estratéxico, no que se analizarán as principais incidencias e desviacións experimentadas, e que poderá conter propostas de mellora dos plans sucesivos. Deste informe daráselle conta ao Pleno da Deputación na primeira sesión ordinaria que realice, e o seu contido terase en conta para a actualización da planificación estratéxica desta Deputación Provincial.

2º.- Someter o expediente a información pública durante o prazo de 20 días hábiles, de conformidade co establecido na Ordenanza xeral de subvencións, durante os cales os interesados poderán examinalo e presentar reclamacións ante o Pleno. O expediente

considerarase definitivamente aprobado, se durante o citado prazo non se presentasen reclamacións.

3º.- APROBACIÓN INICIAL DA ORDENANZA FISCAL REGULADORA DA TAXA POLA PRESTACIÓN DO SERVIZO MUNICIPAL DE SUBMINISTRACIÓN DE AUGA POTABLE NO MUNICIPIO DOS BLANCOS.-

O Sr. secretario expón o contido da proposta.

Non se producen intervencións e co voto favorable do Grupo Popular (5) e de Democracia Ourensana (1) e a abstención do Grupo Socialista (3), do BNG (1) e de Ciudadanos-Partido de la Ciudadanía (1), a comisión ditamina favorablemente a adopción, por parte do Pleno, do seguinte acordo:

1º) Aprobar inicialmente a Ordenanza fiscal reguladora da taxa pola prestación do servizo municipal de subministración de auga potable no municipio dos Blancos, conforme ao seguinte texto:

EXPOSICIÓN DE MOTIVOS

O Concello dos Blancos aprobou o 21 de agosto de 2017 un plan de axuste económico coa finalidade de obter un préstamo con cargo ao compartimento Fondo de ordenación do Fondo de financiamento das entidades locais, coa finalidade de afrontar a súa importante débeda municipal. A fin de executar unha das medidas incluídas nese plan de axuste, o Pleno do Concello dos Blancos de 20 de decembro de 2017 prestou a conformidade para que a Deputación Provincial de Ourense asumise temporalmente a prestación de determinados servizos mínimos obrigatorios ao abeiro do disposto no artigo 84 da Lei 5/1997, de 22 de xullo da administración local de Galicia, entre os que se encontra o de abastecemento domiciliario de auga potable, competencia propia dos municipios (artigo 25.1.c) da LBRL) que deben prestar nos termos establecidos na lexislación estatal e das comunidades autónomas. A Deputación Provincial de Ourense asumiu eses servizos trala publicación do Acordo do Consello da Xunta de Galicia de 1 de febreiro de 2018 que autorizou á Deputación para a asunción destes servizos no Concello dos Blancos (DOG núm. 52 de 14 de marzo de 2018).

De acordo co previsto no artigo 84.2 da Lei de administración local de Galicia, a Deputación Provincial de Ourense non se limita á mera prestación do servizo, senón que asume as funcións públicas da súa ordenación e xestión e o seu financiamento, e sen prexuízo

da posibilidade de gravar con taxas aos beneficiarios, o que xustifica a aprobación da presente ordenanza fiscal e o cumprimento dos principios de necesidade, eficacia, eficiencia e proporcionalidade e seguridade xurídica esixidos no artigo 129 da Lei 39/2015, de 1 de outubro do procedemento administrativo común das Administracións Públicas. Así mesmo, os bens de dominio público afectos aos servizos obxecto de asunción de titularidade de concello quedan adscritos temporalmente á Deputación Provincial de Ourense durante o período de asunción (revertendo ao concello á finalización do período de asunción de servizos), correspondéndolle á deputación o exercicio dos actos de conservación, mantemento e administración

Esta ordenanza dítase ao abeiro do establecido nos artigos 106 da Lei 7/1985, de 2 de abril, reguladora das bases de réxime local, 15 a 19, 20.4.t) e 57 do Real decreto lexislativo 2/2004, de 5 de marzo polo que se aproba o texto refundido da Lei reguladora da facendas locais, cumprindo co principio de seguridade xurídica esixidos no artigo 129 da Lei 39/2015, de 1 de outubro do procedemento administrativo común das Administracións Públicas.

A presente ordenanza contén tres títulos. O título preliminar (artigos 1 a 5) recolle as disposicións xerais de natureza tributaria configurándose a prestación patrimonial polo servizo como unha taxa, conforme ao criterio establecido na sentenza do Tribunal Constitucional núm. 185/1995, de 5 de decembro (BOE núm. 11 do 12 de xaneiro de 1996) posteriormente incorporado á regulación deste tributo no vixente Texto Refundido da Lei reguladora das facendas locais (artigo 20.1.B) en relación co artigo 20.4.t) e 20.6 a contrario do dito texto legal) e ao ser o abastecemento á poboación un servizo público esencial, imprescindible para a vida das persoas e prestado mediante xestión directa. O servizo non se configura como de recepción obrigatoria a fin de respectar os dereitos recoñecidos nas disposicións transitorias 1ª á 3ª do Real decreto lexislativo 1/2001, de 20 de xullo polo que se aproba o texto refundido da Lei de augas aos titulares de dereitos sobre augas públicas e privadas procedentes de mananciais, pozos e galerías derivados da Lei 13 de xuño de 1879, así como os das comunidades de usuarios. Sobre esta base, o feito impoñible límitase á prestación do servizo de abastecemento a través de redes de titularidade municipal respectando o principio de competencia, e incluíndo no dito servizo a conservación e mantemento dos contadores, ao ser un elemento esencial para a súa correcta prestación, así como a instalación e ou substitución do contador.

O título I (artigos 6 a 9) regula as materias propias da taxa así como as normas de xestión, liquidación, inspección e recadación. A determinación da cota tributaria é respectuosa co principio comunitario de recuperación dos custes dos servizos relacionados coa auga (artigo 9 da Directiva marco da auga e 111.bis.1 do Real decreto legislativo 1/2001, de 20 de xullo polo que se aproba o texto refundido da Lei de augas) por parte de tódalas administracións que interveñen no ciclo da auga (artigo 40 da Directiva marco da Auga) así como do principio de suficiencia financeira. A cota tributaria fixada é coherente co resultado do estudo económico-financeiro no sentido de recuperar os custes do servizo e respectando a limitación establecida polo artigo 24 da Lei reguladora das facendas locais de non exceder, en conxunto, do custo real ou previsible do servizo tendo en conta tanto os custes directos como indirectos incluíndo os de carácter financeiro, amortización do inmovilizado e os necesarios para garantir o mantemento de desenvolvemento razoable do servizo. Dáse cumprimento ao mandato recollido no artigo 129.7 da Lei 39/2015, de 1 de outubro, do procedemento administrativo común das administracións públicas en canto que as decisións económicas adoptadas respectan os principios de estabilidade orzamentaria e sustentabilidade financeira. Coa finalidade de cumprir os principios xerais de actuación recollidos no artigo 40 da Lei 9/2010 de 4 de novembro, de augas de Galicia introdúcese criterios que intensifican a progresividade da taxa para promover un uso eficiente da auga por parte dos usuarios. Neste senso, ademais de establecer un sistema de contía variable de treitos máis oneroso canto máis auga se consuma, trasládase á tarifa variable unha parte dos custos fixos. Con este sistema garantírase o establecemento dunha taxa que posibilite o acceso universal de tódalas persoas aos consumos vitais e agravaranse os consumos excesivos incentivando o aforro de auga.

O título II (artigo 10) regula o réxime sancionador limitándose a unha remisión ás normas establecidas na Lei xeral tributaria e demais normativa que regulan esta cuestión a fin de evitar a duplicidade innecesaria da normativa. A ordenanza finaliza cunha única disposición derradeira relativa a entrada en vigor.

A presente ordenanza non ten repercusións en cuestións de xénero polo que non é necesario a elaboración do informe non vinculante sobre o impacto nesta materia regulado nos artigos 19 da Lei orgánica 3/2007, de 22 de marzo para a igualdade efectiva entre mulleres e homes (que de acordo coa súa Disposición Final 1ª forma parte das condicións básicas que garanten a igualdade de tódolos españois no exercicio dos dereitos e o

cumprimento dos deberes constitucionais de acordo co establecido no artigo 149.1.11 da CE) e 8 do Decreto legislativo 2/2015, de 12 de febreiro polo que se aproba o texto refundido das disposicións legais da Comunidade Autónoma de Galicia en materia de igualdade. A redacción da ordenanza respecta a perspectiva de xénero na linguaxe escrita cumprindo o disposto nas anteriores normas e no I Plan de igualdade de oportunidades entre mulleres e homes da Deputación Provincial de Ourense para os anos 2017-2021.

A presente ordenanza ten impacto na actividade económica xa que establece as prestacións patrimoniais tributarias que se devindicarán con ocasión da prestación do servizo público municipal de abastecemento de auga potable. A sentenza do Tribunal Constitucional 55/2018, de 24 de maio (BOE núm. 151 de 22 de xuño de 2018) declarou que o artigo 133 da Lei 39/2015, de 1 de outubro, do procedemento administrativo común das administracións públicas (agás o primeiro inciso do seu apartado 1º e o primeiro parágrafo do seu apartado 4º) é contrario á orde constitucional de competencias (FX 7) polo que non é necesario realizar unha consulta pública previa á tramitación da presente ordenanza ao non existir normativa autonómica que así o esixa. Non obstante, de acordo co previsto no artigo 17 do Real decreto legislativo 2/2004, de 5 de marzo polo que se aproba a Lei reguladora das facendas locais, trala aprobación provisional da presente ordenanza polo Pleno provincial, esta exporase durante trinta días, como mínimo, para que as persoas interesadas poidan examinar o expediente e presentar as reclamacións que estimen oportuno. Con este trámite cómprese o principio de transparencia establecido no artigo 129 da Lei 39/2015, de 1 de outubro, do procedemento administrativo común das administracións públicas.

TÍTULO PRELIMINAR: DISPOSICIÓNS XERAIS

Artigo 1.- Obxecto, fundamento, natureza e ámbito territorial de aplicación

- 1. Constitúe o obxecto desta ordenanza fiscal a ordenación e imposición da taxa correspondente ao servizo municipal de subministración de auga potable no Concello dos Blancos.*
- 2. A competencia para a aprobación de esta Ordenanza fiscal correspóndelle a Deputación Provincial de Ourense, no exercicio das competencias municipais do Concello dos Blancos asumidas de acordo coa autorización realizada polo Consello da Xunta de Galicia de 1 de febreiro de 2018 (DOG 14 de marzo de 2018) no marco do establecido no artigo 84 da Lei de administración local de Galicia.*

A aprobación desta ordenanza fiscal por parte da Deputación Provincial de Ourense realízase ao abeiro do establecido nos artigos 106 da Lei 7/1985, de 2 de abril

reguladora das bases do réxime local, 15 a 19 do Real Decreto lexislativo 2/2004, de 5 de marzo polo que se aproba o texto refundido da Lei reguladora das facendas locais, seguindo o establecido nos artigos 20.4.t) e 57 e 132 do Real Decreto lexislativo 2/2004, de 5 de marzo polo que se aproba o texto refundido da Lei reguladora das facendas locais.

- 3. Configúrase o pagamento do servizo de subministración de auga potable como taxa por ser un servizo público imprescindible para a vida das persoas xestionado de forma directa pola administración, estando prevista a súa aplicación para os servizos de distribución de auga no artigo 20.4.t) do Texto refundido da lei reguladora das facendas locais.*
- 4. O ámbito territorial de aplicación desta ordenanza está integrado polo termo municipal dos Blancos.*

Artigo 2. Feito imponible.

Constitúe o feito imponible da taxa regulada nesta ordenanza a prestación do servizo de distribución e subministración de auga potable a través das redes de titularidade municipal, no que se inclúe ademais a conservación e mantemento dos contadores de consumo de auga. Nas altas no servizo inclúese tamén a tarifa de instalación e reposición do contador.

A prestación de conservación e mantemento de contadores inclúe a súa reparación ou substitución nos casos en que sexa necesario, agás nos supostos nos que a avaría ou mal funcionamento do contador sexa por causa imputable ao suxeito pasivo, en cuxo caso aplicarase a tarifa de instalación e reposición de contadores.

Artigo 3. Suxeitos pasivos.

- 1. Son suxeitos pasivos, en concepto de contribuíntes, as persoas físicas e xurídicas e as entidades a que se refire o artigo 35.4 da Lei 58/2003, de 17 de decembro xeral tributaria, que utilicen ou teñan a posibilidade de utilizar o servizo municipal de subministración de auga potable.*
- 2. Serán suxeitos pasivos en concepto de substitutos da persoa contribuínte:*
 - a. As persoas propietarias ou titulares das vivendas ou locais que poderán repercutir as cotas sobre os respectivos beneficiarios ou usuarios do servizo (artigo 23.2.a) de LRHL)*
 - b. Cando un mesmo inmovible se compoña de varios locais será a comunidade de propietarios ou a entidade ou organismo que administre a mencionada unidade, sen prexuízo da súa repercusión ás persoas beneficiarias.*

3. Responderán solidaria ou subsidiariamente das obrigas tributarias do suxeito pasivo as persoas físicas e xurídicas ás que a Lei xeral tributaria ou a Lei reguladora das facendas locais atribúe tal responsabilidade.

Artigo 4. Base de gravame.

Son obxecto de gravame:

- a) *A subministración de auga, que inclúe a posta a disposición do servizo e os metros cúbicos realmente consumidos.*

A base imponible da taxa responde a unha fórmula binómica que a cuantifica dun lado en función da dispoñibilidade do servizo (contía fixa periódica) e doutro en función da utilización efectiva medida polo volume de auga, en metros cúbicos, consumidos ou subministrados ao inmovible (contía variable). A contía fixa cubre, aproximadamente, o 50% dos custos fixos do servizo a fin de garantir a accesibilidade universal das persoas usuarias aos consumos vitais. Trasládase o outro 50% dos custos fixos do servizo á contía variable como unha medida de fomento para o consumo responsable da auga. A contía variable determinarase en función do volume de auga consumida que se obterá mediante a diferenza da lectura dos consumos rexistrados nos respectivos contadores de medida durante dous períodos impositivos consecutivos.

Se non fose posible coñecer o consumo real por avaría do contador ou por imposibilidade da súa lectura por causas non imputables á Administración, se estimará este conforme ás seguintes regras:

1ª) Como regra xeral considerarase un consumo igual ao producido no mesmo período do exercicio anterior.

2ª) Se o consumo anterior non fose significativo ou non existisen datos do devandito período, estimarase un consumo equivalente á media aritmética dos últimos consumos coñecidos ou, se isto non fose posible, aplicarase a media dos consumos que se realice no termo municipal no mesmo período do exercicio anterior.

Os consumos estimados devirán firmes en caso de avaría no contador. Nos restantes supostos regularizarase a situación na liquidación ou liquidacións seguintes unha vez obtida unha nova lectura real.

- b) *A conservación e mantemento de contadores de consumo de auga, establecéndose unha tarifa fixa por unidade e mes.*

- c) *A subministración e instalación de contadores, no momento da alta no servizo ou cando deban ser substituídos por causa imputable ao usuario, establecéndose unha tarifa fixa.*

Artigo 5. Período impositivo e aplicación da taxa.

1. *O período impositivo coincidirá co trimestre natural.*
2. *As baixas e cambios de titularidade producidos dentro de cada período impositivo producirán a súa eficacia no trimestre posterior.*

Título I Das taxas.

Artigo 6. Cota tributaria.

1. *O cadro aplicable é o seguinte:*

Cota A: Subministración de auga:

Contía fixa2,75 €/mes

Contía variable:

1.Treito 1: de 0 m³ e
ata 6 m³ /mes0,20 €/m³
2.Treito 2: máis de 6
m³ ata 12 m³ /mes0,40 €/m³
3.Treito 3: máis de 12
m³ ata 24 m³ /mes0,80 €/m³
4.Máis de 24 m³/mes
.....1,60 €/m³

Cota B: Conservación e mantemento de contadores.....0,60 €/mes

Cota C: Instalación e reposición de contadores100,00 €/ud

2. *As cotas da tarifa son mensuais, agás a cota da instalación e reposición de contadores que é única.*

Artigo 7. Devindicación e cobramento das taxas.

1. *As taxas devindicaranse na data de alta no servizo, e o primeiro día de cada mes nos meses sucesivos, e cobraranse cada tres meses.*
2. *A liquidación e recadación das cotas efectuaranse nos mesmos períodos e nos mesmos prazos e xunto cos recibos das taxas pola prestación do servizo municipal da rede de sumidoiros e*

tratamento e depuración de augas residuais. Os recibos incluírán todos aqueles impostos, canons e coeficientes relacionados co ciclo hidráulico.

Artigo 8. Exencións e bonificacións.

Non se establece ningunha exención ni bonificación na exacción desta taxa.

Artigo 9. Normas de xestión, liquidación, inspección e recadación.

- 1. Para os efectos da aplicación desta ordenanza, considerarase administración tributaria á que en cada caso exerza a competencia de xestión tributaria e recadación. Por persoa aboada entenderase toda persoa natural ou xurídica con capacidade legal para ser titular de dereitos e obrigas á quen se lle concedese o servizo de subministración de auga potable para cada un dos inmobles aos que se lles preste o servizo.*
- 2. A taxa xestionarase de oficio a administración tributaria, a partir dun padrón que se formará trimestral, que se aprobará mediante resolución da Presidencia, ou do órgano en cada caso competente no caso de que a administración tributaria non sexa a Deputación Provincial de Ourense. O padrón recollerá os seguintes datos, para cada feito impositivo do que a administración teña constancia:*
 - a. Nome ou razón social e número de identificación fiscal do suxeito pasivo.*
 - b. Data de xeración da taxa e período impositivo.*
 - c. Cota tributaria líquida, determinada pola suma das contías aplicables conforme á esta ordenanza.*
 - d. Prazos para o pagamento voluntario da taxa, que en ningún caso será inferior a dous meses.*
- 3. O padrón será obxecto de publicación no Boletín Oficial da Provincia, na sede electrónica da Deputación Provincial de Ourense e no taboleiro de edictos do Concello dos Blancos.*
- 4. No caso de imposibilidade de lectura do contador por encontrarse pechado o acceso a este durante dous trimestres consecutivos practicarase unha notificación individual á persoa interesada con apercibimento de corte da subministración e sen prexuízo doutras responsabilidades esixidas.*
- 5. O cobro da taxa realizarase cada tres meses, mediante a emisión dos correspondentes recibos, que serán comunicados aos interesados para os efectos puramente informativos. A comunicación dos recibos non terá o carácter de notificación da liquidación tributaria, que se entenderá realizada mediante a publicación do Padrón correspondente.*

6. *Para tódolos efectos, entenderase como domicilio de cobro de cada recibo o domicilio fiscal da persoa contribuínte ou da persoa que o substitúa, conforme coa lexislación tributaria vixente.*
7. *No non previsto nesta ordenanza, a inspección e recadación da taxa rexeráse polo establecido na lexislación tributaria vixente que resulte de aplicación.*

TÍTULO II. RÉXIME SANCIONADOR

Artigo 10. Infraccións e sancións.

En materia de infraccións e sancións relacionadas coa taxa regulada nesta ordenanza fiscal, estarase ao disposto na Lei xeral tributaria e demais normativa aplicable para o efecto.

Disposición derradeira.

Esta ordenanza fiscal entrará en vigor o primeiro día do primeiro trimestre natural seguinte á data da publicación do seu texto íntegro no Boletín Oficial da Provincia de Ourense e sempre que se cumpran os requisitos para a súa entrada en vigor establecidos na lexislación de réxime local e de facendas locais.

2º) Someter o presente expediente e o acordo de aprobación inicial ao trámite de información pública, por un prazo de trinta (30) días hábiles, mediante a inserción de anuncios no BOP de Ourense, na sede electrónica da Deputación en nun dos xornais de maior difusión da provincia, todo elo de conformidade co previsto no artigo 17 do Texto Refundido da Lei reguladora das Facendas Locais. Durante o dito prazo, as persoas interesadas poderán formular as reclamacións que consideren oportunas, as cales deberán ser resoltas polo pleno da corporación provincial, a través de acordo de aprobación definitiva. No caso de que non se formulasen reclamacións en prazo, o acordo de aprobación inicial elevarase a definitivo, sen necesidade de acordo plenario expreso.

4º.- APROBACIÓN INICIAL DA ORDENANZA FISCAL REGULADORA DAS TAXAS DOS SERVIZOS DE SANEAMENTO E DEPURACIÓN DO CONCELLO DOS BLANCOS.-

O Sr. secretario expón o contido da proposta.

Non se producen intervencións e co voto favorable do Grupo Popular (5) e de Democracia Ourensana (1) e a abstención do Grupo Socialista (3), do BNG (1) e de Ciudadanos-Partido de la Ciudadanía (1), a comisión ditamina favorablemente a adopción, por parte do Pleno, do seguinte acordo:

1º) Aprobar inicialmente a Ordenanza fiscal reguladora das taxas pola prestación dos servizos de saneamento e depuración de augas residuais no municipio dos Blancos, conforme ao seguinte texto:

EXPOSICIÓN DE MOTIVOS

O Concello dos Blancos aprobou o 21 de agosto de 2017 un plan de axuste económico coa finalidade de obter un préstamo con cargo ao compartimento Fondo de ordenación do fondo de financiamento das entidades locais coa finalidade de afrontar a súa importante débeda municipal. A fin de executar unha das medidas incluídas nese plan de axuste, o Pleno do Concello dos Blancos de 20 de decembro de 2017 prestou a conformidade para que a Deputación Provincial de Ourense asumise temporalmente a prestación de determinados servizos mínimos obrigatorios ao abeiro do disposto no artigo 84 da Lei 5/1997, de 22 de xullo da administración local de Galicia, entre os que se encontra o de saneamento, competencia propia dos municipios (artigo 25.1.c) da LBRL) que deben prestar nos termos establecidos na lexislación estatal e das comunidades autónomas. A Deputación Provincial de Ourense asumiu eses servizos trala publicación do Acordo do Consello da Xunta de Galicia de 1 de febreiro de 2018 que autorizou á Deputación para a asunción destes servizos no Concello dos Blancos (DOG núm. 52 de 14 de marzo de 2018).

Outro dos servizos asumidos pola Deputación Provincial en virtude do plan de axuste mencionado foi o de depuración de augas residuais, ante a imposibilidade do Concello dos Blancos de seguir prestándoo. Nese senso, o artigo 36.1.c) da Lei de bases de réxime local establece que as deputacións provinciais asumirán a prestación dos servizos de tratamento de residuos nos municipios de menos de 5.000 habitantes cando estes non procedan a súa prestación. Esta expresión, tratamento de residuos, non se limita unicamente aos residuos sólidos senón que comprende tamén as augas residuais urbanas polo que a asunción deste servizo é unha competencia provincial propia subsidiaria da municipal.

O Pleno da Deputación Provincial de Ourense, mediante acordo do 22 de decembro de 2017 asumiu a prestación deste servizo en réxime de competencia propia ao abeiro do establecido no artigo 36.1.c) da Lei de bases de réxime local.

De acordo co previsto no artigo 84.2 da Lei de administración local de Galicia, a Deputación Provincial de Ourense non se limita á mera prestación dos servizos, senón que asume as funcións públicas de ordenación e xestión dos mesmos, asumindo o seu financiamento e sen prexuízo da posibilidade de gravar con taxas aos beneficiarios, o que

xustifica a aprobación da presente ordenanza fiscal e o cumprimento dos principios de necesidade, eficacia, eficiencia e proporcionalidade e seguridade xurídica esixidos no artigo 129 da Lei 39/2015, de 1 de outubro do procedemento administrativo común das Administracións Públicas. Así mesmo, os bens de dominio público afectos aos servizos obxecto de asunción de titularidade de concello quedan adscritos temporalmente á Deputación Provincial de Ourense durante o período de asunción (revertendo ao concello á finalización do período de asunción de servizos), correspondéndolle á deputación o exercicio dos actos de conservación, mantemento e administración.

Esta ordenanza dítase ao abeiro do establecido nos artigos 106 da Lei 7/1985, de 2 de abril, reguladora das bases de réxime local, 15 a 19, 20.4.t) e 57 e 132 do Real decreto lexislativo 2/2004, de 5 de marzo polo que se aproba o texto refundido da Lei reguladora da facendas locais e 81 e 296 da Lei 5/1997, de 22 de xullo da administración local de Galicia cumprindo co principio de seguridade xurídica esixidos no artigo 129 da Lei 39/2015, de 1 de outubro do procedemento administrativo común das Administracións Públicas.

A presente ordenanza contén tres títulos. O título preliminar (artigos 1 a 3) recolle as disposicións xerais de natureza tributaria configurándose a prestación patrimonial polo servizo como unha taxa, conforme ao criterio establecido na sentenza do Tribunal Constitucional núm. 185/1995, de 5 de decembro (BOE núm. 11 do 12 de xaneiro de 1996) posteriormente incorporado á regulación deste tributo no vixente Texto Refundido da Lei reguladora das facendas locais (artigo 20.1.B) en relación co artigo 20.4.r) e 20.6 a contrario do dito texto legal) e ao ser o saneamento e depuración servizos públicos esenciais, imprescindibles para a vida das persoas e prestados mediante xestión directa.

O título I (artigos 4 a 11) regula as cuestións comúns ás taxas de ámbolos dous servizos. A fin de facilitar a claridade e comprensión da ordenanza divídese en tres capítulos. O capítulo I (artigos 4 e 5) regula a taxa correspondente ao servizo municipal da rede de evacuación. Neste caso a cota tributaria é fixa. O capítulo II (artigos 6 e 7) regula as taxas correspondentes ao servizo municipal de depuración de augas residuais. Neste último suposto, a determinación da cota tributaria varía dependendo de que a persoa usuaria estea ou non adscrita ao servizo municipal de subministración de auga potable. Para aqueles usuarios que estean adscritos e coa finalidade de cumprir os principios xerais de actuación recollidos no artigo 40 da Lei 9/2010 de 4 de novembro, de augas de Galicia, introdúcese criterios que intensifican a progresividade da taxa para promover un uso eficiente da auga

por parte dos usuarios. Neste senso, ademais de establecer un sistema de contía variable de treitos máis oneroso canto máis auga se consuma, trasládase a esta última unha parte dos custos fixos. Con este sistema garantírase o establecemento dunha taxa que posibilite o acceso universal de tódalas persoas aos consumos vitais e agravaranse os consumos excesivos incentivando o aforro de auga. Este incentivo non pode ser aplicado a aqueles usuarios que non estean adscritos ao servizo municipal de subministración de auga potable ao carecer de datos de consumo polo que para estes casos se establece unha única cota fixa. En ambos supostos, a cota fíxase de acordo co principio comunitario de recuperación dos custes dos servizos relacionados coa auga (artigo 9 da Directiva marco da auga e 111.bis.1 do Real decreto lexislativo 1/2001, de 20 de xullo polo que se aproba o texto refundido da Lei de augas) por parte de tódalas administracións que interveñen no ciclo da auga (artigo 40 da Directiva marco da Auga) así como do principio de suficiencia financeira. A cota tributaria é coherente co resultado do estudo económico-financeiro no sentido de recuperar os custes do servizo e respectando a limitación establecida polo artigo 24 da Lei reguladora das facendas locais de non exceder, en conxunto, do custo real ou previsible do servizo tendo en conta tanto os custes directos como indirectos incluíndo os de carácter financeiro, amortización do inmovilizado e os necesarios para garantir o mantemento de desenvolvemento razoable do servizo. Cúmprese co mandato recollido no artigo 129.7 da Lei 39/2015, de 1 de outubro, do procedemento administrativo común das administracións públicas en canto que as decisións económicas adoptadas respectan os principios de estabilidade orzamentaria e sustentabilidade financeira.

Tanto o servizo de evacuación como o de depuración de augas residuais configúranse como de recepción obrigatoria alí onde exista a rede municipal de sumidoiros como unha medida tendente a evitar a degradación do medio ambiente e a contaminación das augas continentais. O capítulo III (artigo 8 a 11) regula cuestións propias das taxas así como as normas de xestión, liquidación, inspección e recadación.

O título II regula o réxime sancionador limitándose a unha remisión ás normas establecidas na Lei xeral tributaria e demais normativa que regulan esta cuestión a fin de evitar a duplicidade innecesaria da normativa. A ordenanza finaliza cunha disposición derogatoria que derroga a Ordenanza fiscal existente no concello en materia de saneamento e unha disposición derradeira relativa a entrada en vigor.

A presente ordenanza non ten repercusións en cuestións de xénero polo que non é necesario a elaboración do informe non vinculante sobre o impacto nesta materia regulado nos artigos 19 da Lei orgánica 3/2007, de 22 de marzo para a igualdade efectiva entre mulleres e homes (que de acordo coa súa Disposición Final 1ª forma parte das condicións básicas que garanten a igualdade de tódolos españois no exercicio dos dereitos e o cumprimento dos deberes constitucionais de acordo co establecido no artigo 149.1.11 da CE) e 8 do Decreto lexislativo 2/2015, de 12 de febreiro polo que se aproba o texto refundido das disposicións legais da Comunidade Autónoma de Galicia en materia de igualdade. A redacción da ordenanza respecta a perspectiva de xénero na linguaxe escrita cumprindo o disposto nas anteriores normas e no I Plan de igualdade de oportunidades entre mulleres e homes da Deputación Provincial de Ourense para os anos 2017-2021

A presente ordenanza ten impacto na actividade económica xa que establece as taxas que se devindicarán con ocasión da prestación do servizo público municipal de evacuación e depuración de augas residuais. A sentenza do Tribunal Constitucional 55/2018, de 24 de maio (BOE núm. 151 de 22 de xuño de 2018) declara que o artigo 133 da Lei 39/2015, de 1 de outubro, do procedemento administrativo común das administracións públicas (agás o primeiro inciso do seu apartado 1º e o primeiro parágrafo do seu apartado 4º) é contrario ao orden constitucional de competencias (FJ 7) polo que non é necesario realizar unha consulta pública previa á tramitación da presente ordenanza ao non existir normativa autonómica que así o esixa. Non obstante, de acordo co previsto no artigo 17 do Real decreto lexislativo 2/2004, de 5 de marzo polo que se aproba a Lei reguladora das facendas locais, trala aprobación provisional da presente ordenanza polo Pleno provincial, esta exporase durante trinta días, como mínimo, para que as persoas interesadas poidan examinar o expediente e presentar as reclamacións que estimen oportuno. Con este trámite dáse cumprimento ao principio de transparencia establecido no artigo 129 da Lei 39/2015, de 1 de outubro, do procedemento administrativo común das administracións públicas.

TÍTULO PRELIMINAR. DISPOSICIÓNS XERAIS

Artigo 1.- Obxecto, fundamento, natureza e ámbito territorial de aplicación

1. Constitúe o obxecto desta ordenanza fiscal a ordenación e imposición das taxas correspondentes ao servizo municipal da rede de evacuación así como a de depuración de augas residuais no Concello dos Blancos.

2. *A competencia para a aprobación desta Ordenanza fiscal en relación co servizo municipal da rede de evacuación de augas residuais correspóndelle a Deputación Provincial de Ourense de acordo coa autorización realizada polo Consello da Xunta de Galicia de 1 de febreiro de 2018 (DOG 14 de marzo de 2018) en relación ao disposto no artigo 26.2.b) da Lei 7/1985, de 2 de abril reguladora das bases do réxime local.*

3. *A competencia para a aprobación desta Ordenanza fiscal en relación co servizo municipal de depuración de augas residuais correspóndelle a Deputación Provincial de Ourense como competencia propia de acordo co establecido no artigo 36.1.c) da Lei 7/1985, de 2 de abril reguladora das bases do réxime local ao non estar a ser prestada polo Concello dos Blancos por causa de insuficiencia económica do municipio.*

4. *A aprobación desta ordenanza fiscal por parte da Deputación Provincial de Ourense realizase ao abeiro do establecido nos artigos 106 da Lei 7/1985, de 2 de abril reguladora das bases do réxime local, 15 a 19 do Real Decreto legislativo 2/2004, de 5 de marzo polo que se aproba o texto refundido da Lei reguladora das facendas locais, 81 e 296 da Lei 5/1997, de 22 de xullo da administración local de Galicia, seguindo o establecido nos artigos 20.4.r) e 57 e 132 do Real Decreto legislativo 2/2004, de 5 de marzo polo que se aproba o texto refundido da Lei reguladora das facendas locais.*

5. *Configúrase o pagamento dos servizos de evacuación e depuración de augas residuais como taxa por ser servizos públicos esenciais, indispensables para a vida das persoas, e ser prestada de forma directa pola Deputación Provincial de Ourense, estando prevista a súa aplicación para os servizos de saneamento e depuración no artigo 20.4.r) do Texto refundido da lei reguladora das facendas locais.*

6. *O ámbito territorial de aplicación desta ordenanza está integrado polo termo municipal do Concello dos Blancos.*

Artigo 2. Feito imponible.

Constitúe o feito imponible da taxa regulada nesta ordenanza a prestación dos seguintes servizos:

a) *A evacuación de augas residuais e pluviais mediante a rede municipal de evacuación.*

b) *O tratamento e depuración dos vertidos anteriores a efectos de devolver a auga depurada aos canles ou medios receptores.*

Artigo 3. Suxeitos pasivos.

1. *Son suxeitos pasivos, en concepto de contribuíntes, as persoas físicas e xurídicas e as entidades a que se refire o artigo 35.4 da Lei 58/2003, de 17 de decembro xeral tributaria, ocupantes dos inmobles que utilicen ou teñan a posibilidade de utilizar os servizos municipais de evacuación e depuración de augas residuais.*

2. *Serán suxeitos pasivos en concepto de substitutos da persoa contribuínte:*

a) *As persoas propietarias ou titulares das vivendas ou locais quen poderán repercutir as cotas sobre os respectivos beneficiarios ou usuarios do servizo (artigo 23.2.a) de LRBRL)*

b) *Cando un mesmo inmovible se compoña de varios locais será a comunidade de propietarios ou a entidade ou organismo que administre a mencionada unidade, sen prexuízo da súa repercusión ás persoas beneficiarias.*

3. *Responderán solidaria ou subsidiariamente das obrigas tributarias do suxeito pasivo as persoas físicas e xurídicas ás que a Lei xeral tributaria ou a Lei reguladora das facendas locais atribúe tal responsabilidade.*

TÍTULO I. DAS TAXAS.

CAPÍTULO I. DA TAXA CORRESPONDENTE AO SERVIZO MUNICIPAL DE SANEAMENTO.

Artigo 4. Base de gravame.

1. *É obxecto de gravame a recepción á rede de evacuación de augas residuais. O servizo é de carácter obrigatorio para tódolos predios do municipio dos Blancos que teñan fachada ás vías públicas onde exista rede de sumidoiros e sempre que a distancia entre esta e o predio non supere os cen metros. Nestes supostos, a exacción levarase a cabo aínda que os interesados non efectúen a conexión á rede.*

2. *A base impositiva da taxa determinarase mediante unha contía fixa que cubre os custes de mantemento da rede de evacuación de augas residuais.*

Artigo 5. Cota tributaria.

A cota aplicable é de 0,50 € por aboado e mes.

CAPÍTULO II. DA TAXA CORRESPONDENTE AO SERVIZO MUNICIPAL DE DEPURACIÓN DE AUGAS RESIDUAIS.

Artigo 6. Base de gravame.

1. É obxecto de gravame a recepción do servizo de depuración de augas residuais. O servizo é de carácter obrigatorio para tódolos predios do municipio dos Blancos que teñan fachada ás vías públicas onde exista rede de sumidoiros e sempre que a distancia entre esta e o predio non supere os cen metros. Nestes supostos, a exacción levarase a cabo aínda que os interesados non efectúen a conexión á rede.

2. A base impoñible da taxa é diferente dependendo de se a persoa aboada está adscrita ao servizo municipal de subministración de auga potable ou non. No primeiro suposto a base impoñible da taxa responde a unha fórmula binómica que a cuantifica dun lado en función da dispoñibilidade do servizo (contía fixa periódica) e doutro a utilización efectiva medida polo volume de auga, en metros cúbicos, consumidos ou subministrados ao inmovible (contía variable). A contía fixa cubre, aproximadamente, o 50% do custo fixo do servizo a fin de garantir a accesibilidade universal das persoas usuarias aos consumos vitais. Trasládase o outro 50% do custo fixo do servizo a contía variable como unha medida de fomento para o consumo responsable da auga. A contía variable determinarase en función do volume de auga consumida que se obterá mediante a diferenza da lectura dos consumos rexistrados nos respectivos contadores de medida durante dous períodos impositivos consecutivos. Se non fose posible coñecer o consumo real por avaría do contador ou por imposibilidade da súa lectura por causas non imputables á Administración, se estimará este conforme ás seguintes regras:

- Como regra xeral considerarase un consumo igual ao producido no mesmo período do exercicio anterior.

- Se o consumo anterior non fose significativo ou non existisen datos do devandito período, estimarase un consumo equivalente á media aritmética dos últimos consumos coñecidos ou, se isto non fose posible, aplicarase a media dos consumos que se realice no termo municipal no mesmo período do exercicio anterior.

Os consumos estimados devirán firmes en caso de avaría no contador. Nos restantes supostos regularizase a situación na liquidación ou liquidacións seguintes unha vez obtida unha nova lectura real.

No suposto de que a persoa aboada non este adscrita ao servizo municipal de subministración de auga potable, a base impoñible da taxa determinarase mediante unha cota fixa que cubre os custes de explotación e mantemento do sistema de depuración de augas residuais.

Artigo 7. Cota tributaria.

1. O cadro aplicable é o seguinte:

a) Usuarios adscritos ao servizo municipal de subministración de auga potable:

Contía fixa1,60 €

Contía variable

Treito 1: de 0 m³ ata 6 m³/mes0,10 €/m³

Treito 2: máis de 6 m³ ata 12 m³/mes.....0,15 €/m³

Treito 3: máis de 12 m³ ata 24 m³/mes.....0,30 €/m³

Treito 4: máis de 24 m³/mes0,60 €/m³

b) Usuarios non adscritos ao servizo municipal de subministración de auga potable: 2,60 €.

2. As cotas son mensuais.

CAPÍTULO III. NORMAS COMÚNS A ÁMBALAS DÚAS TAXAS.

Artigo 8. Período impositivo e aplicación das taxas.

1. O período impositivo coincidirá co trimestre natural.

2. As baixas e cambios de titularidade producidos dentro de cada período impositivo producirán a súa eficacia no trimestre posterior.

Artigo 9. Devindicación e cobramento das taxas.

1. As taxas devindicaranse na data de alta no servizo e o primeiro día de cada mes nos meses sucesivos, e cobraranse cada tres meses.

2. A liquidación e recadación das cotas efectuaranse nos mesmos períodos e nos mesmos prazos e xunto cos recibos das taxas pola prestación do servizo municipal de subministración de auga potable, se é o caso. Os recibos incluírán todos aqueles impostos canóns e coeficientes relacionados co ciclo hidráulico.

Artigo 10. Exencións e bonificacións.

Non se establece ningunha exención ni bonificación na exacción destas taxas.

Artigo 11. Normas de xestión, liquidación, inspección e recadación.

1. Para os efectos da aplicación desta ordenanza, considerarase administración tributaria á que en cada caso exerza a competencia de xestión tributaria e recadación. Por aboado entenderase a toda persoa natural ou xurídica con capacidade legal para ser titular de dereitos e obrigas que estea obrigada a recepción da prestación dos servizos municipais de evacuación e depuración de augas residuais para cada uno dos inmobles aos que se lles preste os servizos.

2. As taxas xestionarase de oficio a administración tributaria, a partir dun padrón que se formará anualmente, que se aprobará mediante resolución da Presidencia, ou do órgano en cada caso competente. O padrón recollerá os seguintes datos, para cada feito impositivo do que a administración teña constancia:

a) Nome ou razón social e número de identificación fiscal do suxeito pasivo.

b) Data de xeración da taxa e período impositivo.

c) Cota tributaria líquida, determinada pola suma das contías aplicables conforme á esta ordenanza.

d) Prazos para o pagamento voluntario da taxa, que en ningún caso será inferior a dous meses.

2. O padrón será obxecto de publicación no Boletín Oficial da Provincia, na sede electrónica da Deputación Provincial de Ourense e no taboleiro de edictos do Concello dos Blancos.

3. O cobro da taxa realizarase cada tres meses, mediante a emisión dos correspondentes recibos, que serán comunicados aos interesados para os efectos puramente informativos. A comunicación dos recibos non terá o carácter de notificación da liquidación tributaria, que se entenderá realizada mediante a publicación do padrón correspondente.

4. Para tódolos efectos, entenderase como domicilio de cobro de cada recibo o domicilio fiscal da persoa contribuínte ou da persoa que o substitúa, conforme coa lexislación tributaria vixente.

5. No non previsto nesta ordenanza, a inspección e recadación da taxa rexerase polo establecido na lexislación tributaria vixente que resulte de aplicación.

TÍTULO II. RÉXIME SANCIONADOR

Artigo 12. Infraccións e sancións.

En materia de infraccións e sancións relacionadas coas taxas reguladas nesta ordenanza fiscal, estarase ao disposto na Lei xeral tributaria e demais normativa aplicable para o efecto.

Disposición derogatoria.

Queda derogada a Ordenanza fiscal reguladora da taxa polo servizo de saneamento da rede de sumidoiros de o Concello dos Blancos (BOP núm. 112 de 16 de maio de 2016).

Disposición derradeira.

Esta ordenanza fiscal entrará en vigor o primeiro día do primeiro trimestre natural seguinte á data da publicación, unha vez publicado o seu texto íntegro no Boletín Oficial da Provincia de Ourense e sempre que se cumpran os requisitos para a súa entrada en vigor establecidos na lexislación de réxime local e de facendas locais

2º) Someter o presente expediente e o acordo de aprobación inicial ao trámite de información pública, por un prazo de trinta (30) días hábiles, mediante a inserción de anuncios no BOP de Ourense, na sede electrónica da Deputación en nun dos xornais de maior difusión da provincia, de conformidade co previsto no artigo 17 do Texto Refundido da Lei reguladora das Facendas Locais. Durante o dito prazo, as persoas interesadas poderán formular as reclamacións que consideren oportunas, as cales deberán ser resoltas polo pleno

da corporación provincial, a través de acordo de aprobación definitiva. No caso de que non se formulasen reclamacións en prazo, o acordo de aprobación inicial elevarase a definitivo, sen necesidade de acordo plenario expreso.

5º.- MOCIÓN DE URXENCIA.- Non se presentan.

6º.- ROGOS E PREGUNTAS.- Non se formulan.

E, ás 17.55 horas, dáse por finalizada a reunión, redactándose a presente acta que se asinará electronicamente. Dou fe.